

# Buna morala – malgrà sconfittas e blessuras

GIUANNA CAVIEZEL/FMR

Dumengia è il svegliarin s'annunzià ad uras pli umanas. Suenten solver e suenter avair fatg canera e chantadas avant l'hotel – ina chaussa fundamentala avant che cumenzar il di – essan nus ans rendids cun il car a la piazza da ballape da Sele/Zell, nua che las dunnas han giugà lur emprim giu cunter l'equipa da la minoritad ospitanta ed il favurit per quest turnier, las Slovenas da la Carinzia.

Sustegn avain nus survegni da tschintg giugadras d'ina squadra locala. Malgrà quest rinforzament avain nus subì ina terrada pulit massiva. Nus n'avain però betg laschè pender il chau ed avain mussà grond engaschi fin la fin dal giu. Tuttas per ina, ina per tuttass – quai è dal reminent er noss clom che jau hai stuì inventar en moda fitg spon-tana, perquai che nus n'avevan gnanca fixà in tal. Era l'equipa dals umens ans ha sustegnidas a l'ur da la piazza cun stgellas, vuvuzelas e cloms. Ils plets en-

curaschants da noss dus trenaders – che n'eran atgnamain betg previs sco trenaders – han er fatg bain a la morala.

Deplorablmain è nossa defensiva centrala *Davia Casanova* sa bles-sada grevmain al cumenzament da la segunda mesadad. Avant ch'ella è vegni-da charrada en l'ospital, han ils organi-satars smatgà ad ella in magiel e duas buttiglias da sport emplenidas cun gervosa en ils mauns. Els han numnà quai medischina. Medischina d'emprim agid. Nossa giugadra *Carmen Wetzel*



Cun bandiera en l'emprim giu – la squadra da «Las Rumantschas».

FOTO MAD

l'ha accompagnada e da cuminanza han ellas chantà duas giadas l'imni rumantsch en il car da malsauns. – Quai è vair patriotissem. Ina da las buttiglias ha dal reminent già ina rusna. Il rest pon ins s'imaginar.

Il suentermezdi han ils umens giugà cunter ils Croats da la Serbia. Suenten intginas difficultads al cumenzament dal giu, han els pudì tegnair pitg fin la fin. Già durant l'emprima mesadad è il chapitani *Andri Bundi*, ch'era

fitg motivà, sa blessà ed ha stuì bandunar la piazza. Malgrà questa disfortuna han ils umens dà cun gronda motivaziun e mussà ina fitg buna prestaziun. Er il trenader da l'equipa, *Eros Bonolini*, è stà zunt cuntent cun l'engaschi da ses giugaders.



La giugadra *Giuanne Caviezel* (sin la fotografia davos sanester) scriva quest'emna regularmain da l'Europeada, il campiunadi da ballape da las minoritads linguistics en Europa.

Dapli detagls davart il turnier: [www.europeada.eu](http://www.europeada.eu).